

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- पैहले आले डोडा जिले दिएं 8एं सीटें पर चुनां प्रचार तेज, जित्थें पैहले गेड़ तैहत 18 सितम्बर गी वोट पोआए जांगन। प्रधानमंत्री मोदी ते बीजेपी दे केई बड्डे नेता 10 सितम्बर दे बाद चुनां प्रचार लेई जम्मू कश्मीर दे दौरे पर आंगन, कांग्रेसी नेता राहुल गांधी 4 सितम्बर गी गूल ते डुरू च चुनां रैलिएं गी संबोधत करगंन।
- भारतीय जनता पार्टी अज्जै थमां अपना सदस्यता अभियान शुरू करा'रदी ऐ, कांग्रेस पार्टी जम्मू कश्मीर विधानसभा दे दूए ते त्रीए गेड़ लेई अज्ज मेदवारें दी सूचि जारी करोग।
- विधानसभा चुनाएं गी कामयाबी कन्ने तोड़ चाढ़ने लेई सब्बै तैआरियां, स्वीप दे जागरूकता अभियान ते चुनां अमले दी सिखलाई बरोबर जारी ऐ।
- पैरिस पैरालंपिक्स च अज्ज भारत गी होर तगमें दी मेद, जम्मू कश्मीर थमां गेदे तीरंदाज शीतल देवी ते राकेश कुमार अज्ज मिक्सड कंपाउंड ओपन श्रेणी च अपना दमखम दस्सगंन।

<><><><><><>

1st Phase

पैहले आले डोडा जिले दियें 8 सीटें पर पहले गेड़ दौरान वोट पाए जांगन। एनसी कांग्रेस गठबंधन गी मेद ऐ जे चऊं सीटें पर क्वाच लीडरें दे चुनां थमां हटने मगरा हालात उंदे पक्खै च होई जांगन, जिल्ले के भाजपा ते पीडीपी अपने प्रतिद्वंदियें गी मात देने ताई पूरा जोर ला करदे न। डोडा, किशतवाड़ ते रामबन दे 8 विधानसभा हल्के दे कन्नो-कन्नी दक्खन कश्मीर दे चार जिलें-अनंतनाग, पुलवामा, शोपियां ते कुलगाम च फैली दियें 16एं सीटें पर 18 सितंबर गी पैहले चरण च मतदान होआ करदा ऐ। चनाब घाटी च 64 मेदवारें सने कुल 219 मेदवार चुनावी मैदान च न। 64 मेदवारें चा 7 साबका मंत्री, 4 महिला ते 25 आजाद मेदवार न। नेशनल कांफ्रेंस ते कांग्रेस दौनें दलें दोस्ताना मकाबले तैहत बनिहाल, भद्रवाह ते डोडा च अपने-अपने मेदवार तोआरे न जिल्ले केनेशनल कांफ्रेंस दा इक्क बागी एन.सी लीडर इंद्रवाल थमां आजाद मेदवार दे तौरा पर चुनां लड़ा करदे ऐ। एहदे अलावा दऊं भाजपा बागी चा रामबन ते पाडर-नागसेनी हल्के थमां अपनी किस्मत आजमा करदे न।

90 मिम्बरी जम्मू-कश्मीर विधानसभा लेई चुनां त्रै चरणे-18 सितंबर, 25 सितंबर ते 1 अक्तूबर गी करोआए जा रदे न। वोटें दी गिनतरी 8 अक्तूबर गी करोआई जाग। 2014 मगरा ते 2019 च दफा 370 हटाने परैत एह जम्मू-कश्मीर च पैहले विधानसभा चुनां न।

<><><><><><>

Star Campaigners

जम्मू कश्मीर च बीजेपी दे चुनां अभियान गी होर बल देने लेई प्रधानमंत्री नरेन्द्र मोदी, अमित शाह, पार्टी दे होर दुए वरिष्ठ नेता 8 सितम्बर मगरा केन्द्र शासत प्रदेश च चुनां प्रचार करगंन। बीजेपी दे वरिष्ठ नेता प्रधानमंत्री होर प्रदेश च दुए गेड़ दा प्रचार करगंन, पर बाकी दे मंत्री पैहले गै चुनां प्रचार लेई औंगन। प्रधानमंत्री होर मेद ऐ जे 2 रैलियां करगंन। इक रैली जम्मू च ते दूई कश्मीर च। उआं अजे तरीके गी मुकदा रूप नेई दित्ता गेआ ऐ। तोआई कांग्रेस पार्टी दे स्टार प्रचारक ते लोकसभा च विपक्ष दे नेता राहुल गांधी होर 4 सितम्बर गी बनिहाल ते डुरु विधानसभा हल्के च चुनावी रैली करगंन। पार्टी दे प्रवक्ता नै आखेआ ऐ जे गांधी होर पैहली रैली गूल च ते दूई रैली डुरू च करगंन।

<><><><><><>

BJP Membership

भारती जनता पार्टी अज्जै थमां अपनी सदस्यता आला अभियान दी शुरू करा'रदी ऐ। इस अभियान दी शुरूआत प्रधानमंत्री नरेन्द्र मोदी होरें बीजेपी अध्यक्ष जे.पी.नड्डा थमां उंदी सदस्यता गी नमें सिरेया शुरू करने लेई प्रमाण पत्र देने कन्नै होग। मजूदा सब्बने सदस्ये गी अपनी सदस्यता नमें सिरेया शुरू करने दी लोड़ ऐ। बीजेपी मूजब हर 5एं-6एं ब'रें च सदस्यता अभियान नमें सिरेया चलाया जंदा ऐ। एह अभियान अज्जै थमां शुरू होइयै 10 नवम्बर तगर केई चरणे च चलाया जाग। इस अभियान तैह्त पैहला चरण 25 सितम्बर गी समाप्त होग।

<><><><><><>

Congress List

कांग्रेस पार्टी दी केन्द्री चुनां कमेटी दी अज्ज लग्गने आली बैठक दे बाद मेद ऐ ते जम्मू कश्मीर विधानसभा चुनां दे दुए ते त्रीए गेड़ लेई पार्टी अपने मेदवारें दे नाएं दा एलान करी देग। पार्टी सूत्रे जानकारी दित्ती ऐ जे पार्टी दे राष्ट्रीय अध्यक्ष मल्लिकार्जुन खरगे हुंदी अध्यक्षता च लग्गने आली इस बैठक च पार्टी दे साबका अध्यक्ष ते लोकसभा च पार्टी दे नेता राहुल गांधी हुंदे इलावा पार्टी दे होर केई बड्डे नेता मजूद रौंहगन।

सूत्रे मूजब संजा 4 बजे लग्गने आली इस बैठक च दुए ते त्रीए गेड दे चुनां लेई पार्टी मेदवारें दे नाएं पर सोच बचार करने दे बाद एह्दे बारे मुकदा फैसला लैता जाग ते कुल भारत कांग्रेस कमेटी दे संगठन महासचिव के. सी.वेनुगोपाल चिरे रातीं मेदवारें दी सूचि जारी करी देंगन।

<><><><><><><>

Go Green Initiative

राजौरी जिले दे सरकारी हायर सकेँडरी स्कूल सोलकी च फौज आस्सेआ बूहटे-पौधे लाने दे इक कार्यक्रम दा सरिस्ता कीता गेआ जेह्दा मकसद लोक अंदर ते चेचा करिये विद्यार्थिएं च पर्यावरण संरक्षण बारे जागरुकता पैदा करना ते भविक्ख लेई खुशगवार ते प्रदूषण रैहत माहोल गी जकीनी बनाना हा। भारतीय फौज ते स्कूल प्रशासन आस्सेआ रलिये लोआए गेदे इक कार्यक्रम च स्कूल दे विद्यार्थिएं दे इलावा अध्यापकें, मकामी लोकें ते केई बजुर्गे बी हिस्सा लैता ते बूहटे लाइयै धरती गी हरा भरा बनाई रखने लेई अपने हिस्से दा योगदान दित्ता। बूहटे-पौधे लाने दी इस मुहिम दा मकसद धरती पर पर्यावरण दा संतुलन बनाई रखने लेई विकास कम्में करी घट्ट होई चुके दे जंगलें दी कमी गी पूरा करना ते जंगली इलाकें च बाद्धा करना हा तां जे पर्यावरण दा तवाजन बरकरार रखेआ जाई सकै।

<><><><><><><>

Amity Gujjar & Bakarwals

पुंछ जिले दी समोट थाहर सेना नै मकामी बसनीकें कन्नै मैत्री आली इक मलाटी लाई। एह्दा मकसद लोकें ते सेना बश्कार तालमेल गी बेहतर करना हा। मकामी लोकें गी मजूदा स्थिति बारे अवगत करोआया गेआ। एह्दे इलावा उनें गी इलाके च आतंकवादी गतिविधिएं कन्नै निबडने ते इलाके गी आतंकवाद थमां मुक्त बनाने लेई कीते जा'रदे जतनें बारे बी दस्सेआ गेआ। इस दरान ग्रामीणे गी दरपेश समस्याएं गी उंदे आस्सेआ उजागर कीता गेआ।

<><><><><><><>

Micro-Observers Doda

डोडा चुनां दफ्तर पास्सेआ औंदे विधानसभा चुनाएं च बतौर माइक्रो आबजर्वर ड्यूटी देने आले निगराने लेई व्यापक सिखलाई आले इक कार्यक्रम दा सरिस्ता कीता गेआ।

इस आयोजन दा मकसद चुनां प्रक्रिया गी पूरी चाल्ली साफ सुथरे, रमानदार, पारदर्शी ते निरपक्ख ढंगे नै तोड़ चाढ़ना जकीनी बनाने लेई निगराने गी जानकारी ते महारत कन्नै पूरी चाल्ली लैस करना हा तां जे उनेंगीकुसै चाल्ली दा कोई बी शकशूबा नेई रेही जा ते ओ चुनां निगरानी दी अपनी ड्यूटी गी पूरी चाल्ली बवस्था आले एंगै सिर ते कामयाबी कन्नै अंजाम देई सकन। इस दरान उनें कुसै बी चाल्ली दी बेजाबतगी जां गड़बड़ी बारे तुरत सूचित करने ते चुनां दे होरने नियमें दे बारे च बी तफसील च समझाया गोआ।

<><><><><><>

Voter Awareness Kathua

कठुआ जिले दे बक्ख-बक्ख तालीमी इदारे च मतदाताएं गी जागरूक बनाने लेई केई सारे कार्यक्रमें दा सरिस्ता कीता गोआ। एह कार्यक्रम स्वीप तैहत आयोजित कीते जा'रदे न। इंदा मकसद जिले च पैहली अक्टूबर 2024 गी होने आले विधानसभा चुनाएं दे त्रीए गेड़ च लोकें दी बद्धोबद्ध हिस्सेदारी गी जकीनी बनाना ऐ। सरकारी मॉडल डिग्री कालेज महानपुर दे अमले ते विद्यार्थिएं आस्सेआ इक रैली कड्डी गई। रैली च प्रतिभागिएं बड़े गै उत्साह कन्नै हिस्सा लैता। रैली दरान प्रतिभागिएं मतदाताएं च जागरूकता फैलाने लेई नारे लाए। इनें हत्थें च बैनर फगड़े दे हे जिंदे राएं मतदाताएं गी लोकतंत्र दे ध्यार बारे अवगत करोआया गोआ। इस मौके पर बोलदे होई लोकें ते विद्यार्थिएं आखेआ.....

<><><><><><>

SVEEP Poonch

ओंदे विधानसभा चुनाएं च मतदाताएं दी शमूलियत गी बधाने दे मकसद कन्नै स्वीप तैहत पुंछ जिले च दूर दरेड़े ते पिच्छड़े दे इलाकें बनवत ढोकरी सरबंधी टीम आस्सेआ दौरा लाया गोआ। दौरे दरान दल नै मतदाताएं दे बक्ख-बक्ख समूहें कन्नै गल्ल कीती जेह्दे च हाशिएं पर रौहने आले युवा, गुज्जर बक्करवाल ते वरिष्ठ नागरिकें बी शामिल हे। व्यापक गल्लबात ते जागरूकता सत्रें दरान टीम दी मतदाताएं गी वोट करने दे उंदे हक ते चुनां प्रक्रिया बारे जानकारी दित्ती। लोकें तगर पुज्ज बनाने आला स्वीप टीम दा एह जतन मतदाताएं च जागरूकता बधाने बारे ते खित्ते च लोकतांत्रिक प्रक्रिया गी मजबूत करने लेई हा.....बाईट

<><><><><><>

Bishan Singh Dardi

बाल साहित्य अकादमी पुरस्कार कन्नै सम्मानत बिशन सिंह दर्दी होरें सांबा जिले दे लोकें गी अपील कीती ऐ जे ओह खरी मती गिनतरी च अगगे औन ते वोट पाने दे अपने अधिकार दा इस्तेमाल करन। दर्दी होर सांबा दे नड ब्लाक दे कलोआ ग्रां दे बसनीक न। उनें आखेआ जे बर्जुग, महिला ते खास तौर पर पैहली बारी मतदान करने आलें गी इस चुनां प्रक्रिया च हिस्सा लैना लोड़चदा ते इस चुनां गी पूरी चाल्ली सफल बनाना लोड़चदा। उनें आखेआ.....

<><><><><><>

Paraolympic

पैरिस पैरालंपिक खेड्डें दे 5में रोज अज्ज भारत गी बक्ख-बक्ख मकाबलें च होर तगमे दी मेद बनी दी ऐ। जम्मू कश्मीर दे दऊं तीरंदाज शीतल देवी ते राकेश कुमार मिक्स्ट कंपाउंड ओपन च अपना दमखम दस्सने लेई परतियै तैआर न। एहदे शा पैहले इनें दौनें पैरा तीरंदाजें सांझे तौरा पर 1 ज्हार 399 दा स्कोर बनाइयै इक नमां पैरालंपिक्स रिकार्ड कायम कीता ते हून ओ क्वार्टर फाइनल लेई अगड़े बघगंन। भारत 1 सुन्ने दा, 2 चांदी दे ते 4 कैह दे तगमे सनें कुल 7 तगमें हासल करियै मैडल तालिका च 27में नंबर पर ऐ।

<><><><><><>